



P A R S I.

De Monarchia Assyriorum.

Adverte primò, quisnam status fuerit Regno Assyriæ antè, quàm ei Sardanapalus imperaret? Secundo, quæ eidem Monarchiæ conditio à Sardanapalo, usque dum ea soluta penitus exspiraret?

CAPUT PRIMUM.

De Statu Monarchiæ Assyricæ usque ad Sardanapali tempora.

1. *Quis Monarchia hujus primus conditor fuit?*

Nemrodus, qui Noëmi pronepos fuit, nepos Chami, Chusi, sive Beli filius. Hic, ut libertate ea, qua sub Patriarchis fruebantur mortales, eos priveret, ingenio usus est suo, animoque dominandi avidissimo; corporis insuper robore, quo præstabat. Titulo itaque Regis assumpto urbem molitus est Babyloniam, quæ à locata ibidem sede regia Imperii metropolis fuit. Quinos supra sexaginta annos imperavit; quòd verò imperaret ut Tyrannus, violenta aliorum manu periit. Anno mundi millesimo nongentesimo, quadragesimo quarto.